

2025-mut Inatsisartut ilassutitut aningaasaliissutitut inatsisissaannut siunnersuut (Aningaasaqarnermut Naalakkersuisoq)

Akissuteqaat

Aappassaaneerinnineq

Aningaasaqarnermut Akileraartarnermullu Ataatsimiititaliap sukumiisumik isumaliutissiissuteqarnera Naalakkersuisut sinnerlugit qujassutigaa.

Ataatsimiititaliap inatsisissatut siunnersuutip akuerineqarnissaanik inassuteqarnera, Naalakkersuisut iluarisimaarlugu maluginiarpaat.

Ataatsimiititaliap isumaliutissiissummini missingersuutit aningaasaliinernillu aqutsinermut naapertuuttunik arlalinnik taasaqarpoq, taakkunanilu ataasiakkaat Naalakkersuisut naatsumik oqaaseqarfigissavaat.

Aningaasaliissutit eqqortinneqartarnissaasa annertunerusumik sammineqartarnissaa, Ataatsimiititaliap inassutigaa. Tassunga tapiliullugu piffissaagallartillugu aningaasaliissutit qaangerneqannginneranni, ileqqaaruteqartarluniluunniit ilassutitut aningaasaliisoqarnissaanik qinnuteqaatinik nassitsisoqartarnissaata pisariaqarnera, ataatsimiititaliap erseqqissarpaa. Naalakkersuisut tamatumani ataatsimiititaliap isumaqatigilluinnarpaat.

Aningaasaliissutitut sulianik saqqummiussinerit pitsaassusaanik qularnaarinissaq ataatsimiititaliap erseqqissarpaa, taamaalilluni ataatsimiititaliap Naalakkersuisullu pisariaqanngitsumik apeqqutit malitseqaataasumik pisariaqanngitsumik piffissamik atueqqunagit. Aningaasaliissutissanut qinnuteqaatit pitsaassusaasa qaffasissuunissaannik anguniagaq, Naalakkersuisut isumaqatigaat.

Naggasiullugu Missingersuusiornermut malittarisassat 2008-meersup nutarterneqarnissaa Ataatsimiititaliap Naalakkersuisunut kaammattuutigaa. Tamanna tunuliaqutaralugu 2026-mut Missingersuusiornermut malittarisassap nutaap akuerineqareersimanerata nalunaarutigisinnaanera Naalakkersuisut annertuumik iluarisimaarpaat. Tamanna piffissami qanittumi nalunaarutigineqassaaq.

Taamattaq Naalakkersuisut ataatsimiititaliap oqaatigisai allat ataatsimut isigalugu isumaqatigaat.

Taamaamat siunnersuut allannguuteqartinnagu aappassaaneerinninnermi akuerineqassasoq Naalakkersuisut inassutigaa.